

清代傳記叢刊・綜錄類⑦
周駿富輯

國朝耆獻類徵初編(三七)

卷二四六至
卷二五二

(清)李桓輯



明文書局印行

11/27/10

國朝書獻類徵初編卷二百四十六目錄

守令三十二

楊兆杏 楊兆李 洪飴孫 莊達吉

莫與儔 羅志謙 高大鑄 陸繼輅

魏瀚 弟瀛 許紹宗 朱鳳森

粹凝度 秦琳 蔡培 素鳳梁 聶鎬敏 弟銑敏

袁名曷 丁公路 賀慧椿 蔣雲容 馮廷松

葉機 沈麟 周儀暉

蔣紹宗 王昭麟 李黼平

程伯鑾

補錄

周際華

163-004

國朝耆獻類徵初編卷二百四十六

通奉大夫前署江西巡撫江西布政使司布政使湘陰李桓輯
守令三十二

楊兆杏 楊兆李

楊兆杏字春暉一字晴園祖文賜始由雲南昆明縣家黔陽父洪
以孝友稱兆杏充乾隆己酉科拔貢生嘉慶二年考取八旗官學
明年戊午中京兆試舉人四年充鑲白旗教習報滿部選湖北武
昌縣知縣調授建始歷署宣恩利川恩施等縣二十三年因監犯
自戕解任既事白免議署應城江陵等縣道光元年補通山六年
委解甘肅軍餉十二年委解高錫十三年署漢陽府通判所莅撫

以寬仁勤能聽斷在建始民多溺女作文勸之犯者以故殺律論
所活無算議修南門外大橋或言不利於官兆杏曰官以爲民
利矣吾何憂毅然行之後雖如其言罷去不悔在恩施開塘堰修
河隄藝山種廣儲社穀由是地不憂旱通山多積案奸猾擇人而
噬期年清結千數百件無枉縱多盜捕其魁誅之餘教以謀生手
製條約反覆勸誡庚寅夏大水兆杏冒暑溼力行賑恤民忘其患
斷某孀婦案兩姓辦香生祀所宰多山邑至卽嚴立書院課程措
置膏火暇輒與諸生講解批抹尤以實行相期由是士習端文風
亦漸興大邑埒性篤學夙號通儒歷充湖北壬午乙酉壬辰鄉試
同考官得人甚盛弱冠時如錢通政澧紀文達公昀趙總憲佑羅

鴻臚典皆巨儒交口延譽嘗主本郡縣書院邑人無甲科至是易
貢俶陳道隆相繼成進士俶選河南盧氏知縣兆杏訓以官須自
己作遽訝其言兆杏曰作好官闔邑人大便闔署人大不便好官
不自作主誰代汝作誰許汝作者後果著循聲生平不計家人產
在應城爲前屬建始典史章鴻捐復其官通山典史葉書歿於任
並資遣其家屬回籍他善舉典衣稱貸曰吾以求心之安而已解
組時年六十八囊橐蕭然晚就養弟兆李汝州官舍兄弟怡怡白
首相對人恆以清白吏目之卒年七十二

右傳易變堯撰

道光壬辰科湖北鄉試秘毓獲幸出湖南楊晴園先生之門先生

下世幾二十年矣嗣君積煥將輯家乘以狀授崧毓屬爲先生立傳竊念先生入室弟子無如易君屏山今屏山旣歿則傳先生者舍予小子其誰故不敢辭而拜手稽首敬書於左

公姓楊氏諱兆杏字春暉晴園其別號也先世籍雲南之昆明乾隆初有官湖北巡撫諱永斌者公之伯曾祖也曾祖諱景斌郡廩生祖諱文賜官湖南永綏廳花園巡檢遷安徽安慶府照磨引疾乞休貧不能歸因家黔陽考諱洪遂爲沅之黔陽人公生而岐嶷與仲弟夢蓮先生早知名受知於學使者錢公澧錢官侍御時直聲震朝野其教士也嚴而有法歿祀湖南名宦至今人師之公與仲弟率其教先後登賢書一時並有國士之目爲學務根柢修身

側行尤爲鄉黨所矜式嘉慶閒公既不得志於春官乃以教習謁
選得湖北知縣初宰建始繼宰應城通山通山在萬山中地最瘠
苦人無冒至者公處之獨久雖十年不調泊如也公所至能得民
尤愛士士爭歸之故去官日囊無一錢而詩歌贈遺恆盈篋子孫
守之人莫不知爲清白吏後嗣也公既以老致仕夢蓮先生亦自
汝州解組歸風雨連牀白頭相對時季弟年齒亦相亞怡怡一室
姜被田荆雖有干駟萬鍾必不以彼易此同邑易屏山良俶不羈
士也少負奇氣好拳勇公教以學折節讀書十年成進士官鄧州
刺史有政聲道光十五年投劾歸過武昌省公畱數月余因識之
於座上鬚髮已白而精悍之色猶見於眉宇小有不平輒瞋目攘

三
慨然在公左右恂恂執弟子禮甚恭酒後抵掌論時事激昂慷慨
欲碎唾壺公因喟然嘆曰余老矣不復問天下事君輩他日恐不
能安閒也師弟相對歔歔此景宛然在目今公既久歸道山屏山
聞亦化去惟余以衰老多病蒿目時艱回憶師言可勝惘惘公之
歿也屏山爲文甚哀述生平之受教誨成全者情極眞摯贈贈如
禮若余小子則陸氏荒莊尤望恩門增愧耳公生於乾隆三十三
年戊子八月初二日卒於道光十九年己亥正月十四日配危氏
早卒繼配文氏後公三年卒子積煥國子監典籍孫三人

門人彭崧毓曰公之宰通山也與通城毗連均爲蕞爾邑民俗頑
悍稱難治時宰通城者爲平湖蔣秋舫先生公之同年友而崧之

受業師也兩公皆盛德長者以儒術化民民樂其政安其教一時
莫不知有兩先生然風尚漸殊異己者多所齟齬兩先生尋皆罷
去公之罷也頗有官私累賴公仲弟及易屏山爲之屏當始得脫
然而歸蔣先生以累羈竟卒於鄂嗚呼廉吏可爲而不可爲古今
有同慨焉或者于公之門三槐之蔭其有可必者不於其身於其
子孫歟

右家傳彭崧毓撰

楊兆李

楊兆李字仲燮一字夢蓮洪次子爲叔潤嗣幼從兄兆杏受讀遇
事指授輒悟長偕游嶽麓京師嘗與趙文恪慎畛羅觀察琦等以

道義相切劘中乾隆甲寅 恩科鄉試舉人嘉慶六年挑發河南
以作好官誓於都門關帝廟自鐫手章曰不貪爲寶曰勤以補拙
歷權太康獲嘉臨漳考城滑濬等縣知縣所在汲汲於忠孝節義
興學校修古蹟百廢具舉十九年授真泌陽縣下車勘斷楊貞女
案豫人譜爲不垂楊傳奇至今演之重修崇聖忠義節孝祠勸建
銅峯書院調鹿邑續刊胡穉威烈女李三行詩入志並爲重修享
室道光元年升陝州直隸州知州勸建召公祠請增祀唐陝東道
大行臺長孫操及召南書院與義學五所又修羊角山石室六年
以運米霉變被議八年豫撫楊國楨奏稱官聲素好民情愛戴請
捐復原官報 可署光州直隸州知州信陽州知州尋補汝州建

汝陽書院置四關義學勸修城池壇廟蝗神祠仁普堂事集而民
不勞累權汝甯歸德等府知府在信陽援武進陽湖例請建節孝
總坊爲上司書吏所持卸事後會新藩栗恭勤公毓美至面求刊
發格式通飭各州縣期年得旌萬三千有奇權歸德檄商邱縣
修復微子墓垣於木蘭故里修孝烈將軍祠其政績卓著不負初
心如此嘉慶戊寅恩科充河南鄉試同考官所得多知名士道光
甲午科乙未恩科充河南鄉試內監試十八年引疾歸卒年
七十有九捐有黔陽縣學鄉試卷費永爲式天性孝友所後父母
早逝每逢忌日齋宿泣拜不與宴樂本生母雲宜人嗜橘病垂篤
醫以妨病禁之遂終身不食橘兄兆杏官湖北負累萬計弟兆棻

輕財好義皆分俸應其緩急無後言尤仁厚廉明鹿邑水災請粟四千餘石按戶撫綏大兵勦滑臺鞫所俘脅從全活獨多襄滑衛軍局毫不苟取同事每加誚讓堅守如常歸德積案六百餘件拉任三月後無留牘有某婦刁悍善訟與夫姪爭產京控者再積年不決時以發審局會訊指其非氏頭觸兆李同官皆爲不平兆李引坐避之加意婉勸翌日再訊則伏地泣曰本欲蕩盡姪產耳今感公不再訟矣凡三歷直牧兩綰郡符必博訪周咨飭屬造報一切事宜權其因革故所在有聲史尙書致儼督學中州時兆李因公謁見闕名刺歡迎曰吾嘗聞古循吏今久耳君名信不愧古人矣姚公祖同撫豫風節凜然獨於兆李有加禮遂首登薦牘晚居

省垣時人繪湘中十八耆英圖齒第二可想見其德望云

右傳易變堯撰

公姓楊氏諱兆李字仲燮一字夢蓮先世有諱辛者明初從黔國公沐英征雲南授武略將軍自江西甯都徙昆明爲縣人世襲千戶十傳而至縣學生寓乾生子二長永斌歷任廣東湖北江蘇巡撫終吏部右侍郎爲雍乾間名臣大學士伯文端鄂爾泰公銘其墓所稱陟山楊公者也次景斌廩膳生景斌生文賜湖南澧州嘉山鎮巡檢署澧州州判調苗疆永綏花園巡檢遷安徽安慶府照磨引疾乞休家黔陽爲縣人是爲公祖文賜生洪太學生以孝聞生子三長兆杏嘉慶戊午舉人湖北通山縣知縣季兆棻次卽公

也出後從父潤乾隆甲寅 恩科舉人嘉慶六年大挑知縣發河南
南謫於神而行歷署太康獲嘉臨漳考城滑潞有政聲大兵之勦
教匪李文成於滑也鞫俘囚多所全活襄滑衛軍局無苟得同僚
誚讓不爲動十九年補泌陽楊某者憎其女夫貧悔婚構訟公廉
得實而女母懼女死已竊遣歸其夫公備彩輿助匭具命其夫婦
入署成禮揚旌鼓吹騎導而歸豫人爲傳奇演之調鹿邑值水災
請粟廣賑道無流殍遷陝州直隸州知州道光六年因事落職八
年巡撫疏言楊兆李官豫有聲百姓愛戴請入貲復官報 可署
光州信陽補汝州直隸州歷署汝甯歸德府知府公所至城池壇
廟書院義學名山勝蹟有廢必舉嘗以爲化民之道尤在轉移其